



Aqqalu C. Jerimiassen

UKA 2022/98

Atassut

23. November 2022

Maniitsumi RG-ip aalisakkanut suliffissuanut, saarullinnik uumatillugit uumatitsivissorlunilu tunissassiorup, nunatsinni annertusiartuinnartup, toqusooruteqartarnerullu piffinni assigiinngitsuni ajornartorsiutaasarnera peqassutsimut innarliinani, aningaasarsiutaanerali tamanut pitsaanerpaaffissamiitinneqarnissaat anguniarlugit, Naalakkersuisut RG suleqatigalugu, nunatta ilaani immikkoortoortaqarfeqalersinnaanera pilersaaruisoqatigiissinnaanerlu pillugit, apeqquteqaat aallaavigalugu oqallinnissamik siunnersuut.

(Inatsisartuni ilaasortaq Siverth K. Heilmann, Atassut)

Aalisarneq eqqartorneqalersillugu kikkorpassuarnut toqqaannartumik isummanik aalassatsitsuartarpoq.

Ukiorpassuarnilu eqqartorneqartuarpoq, aalisarnikkut imartatsinni aalisakkat pisatta avammut tuniniarneqarneranni nalittorsarneqarnissaanut pikkorinnerusariaqarnerput, ila meeraavungali oqaatsit tamakku tusartalerakkit. Kiisaana maanna 40-inut qanillattulersunga inatsisartooqataalerlungalu, sulii nalittorsaanerusariaqarnermik oqaluttuarnerit ingerlajuartut.

Ajoraluurtumillumi ilaatiguttaaq oqarluartaarutiniq piviusuunngitsunillu piviusulioortarnertaaq nunatsinni aalisarneq pillugu tusarsaajuartaqaaq.

Aap, tamatta piumavarput aalisangaatitta avammut tuniniarneqarnerminni nalittorsarneqarluarsimallutik isertitsissutaalluarlutik inissisimanissaat.

Unali maanna inuiaqatigiinnut atorneqartartoq piviusuunasorineqalernikoq inoqaterpassuatinnit taarusunnartaraluaqaaq; ”soorooruna qallunaat nunaat aalisagaqarani taama aningaasarsiortigisoq”? ”Sooruna Danmarkip aalisagaatigut tilligaannarai”?

Taakkuli apeqqutit niaqquatsinni nammineq pilersitaapput piviusuusorineqalernikut, niuernikkullu ilinniarsimanermik immaqa ilaatigut paasisimasat suunersut amingarsinnaanerinik malitseqartumik inuppassuarnut piviusuulersimallutik. Uaniimmammi piviusoq, uagununa suliffeqarfiutitta aalisakkat piareerlugit suliarineqanngitsut avammut tuniinnartaraat, tassanilu pisiortortoq annerpaaq tassaammat Qallunaat nunaat, taakkulu namminneq isumattaannguaminnik niuernermut eqqarsarsinnaassusertik atorlugu tunisassiareqqittarpaat, imaanngitsoq tillillugit.

Uagut piumagutta taamaalisinnaaqaagut, namminerli niuffarissuserput tassa naliliinnarumaarparput. Niivertuulluurtummi soorunami iluanaarutissani isigisarpaa, avataanilu niuffannermi niuerneq misigissuseqanngimmat qanoq pitsaanerpaaffianiissinnaanersoq ujartorneqartuarpoq. Niivertullu pitsassuit soorunami akigissaarteqalugu tuneqqittaraat, imaanngitsoq taava nunatsinni uukapaatitaasoqartoq. Aalisakkanik avammut tunisassiornermiuna iluanaaruteqarnerunissarput

ujartorneruinnartariaqalerippu allat pisuutinnissai tunulliutiimilaarluguli, ajornanngippallaaqaarmi allanit pisuutitsilaaginnartarneq isiginnaartuinnartullu misigisimaneq. Tamakku tamaasa nammineq pilersitaraagut namminerlu aamma allannortikkusukkutsigit allannortissinnaallugit.

RG-mi uumatitsiveqarneq maanna misilittagaqarfigineqartoq ukiorpanngortuni, nunarsuatsinni niuffannermi akigissaarfiusumik ingerlanneqartoq inersisaqqissallugu soqutiginaateqarsinnaavoq, taamaattorliuna suna periuseq atorlugu inersisaqqinnissamimmita eqqarsarniartugut?

Oqallisissiaqartup oqarneratuut, pisarisuukkalluunniit atorluarneqarsinnaanerat suli inersarsimannilarput, aalisakkallu aaliangersimasuinnaat kisiisa tunisassariuarpagut inersisaqqinnissamik tappigeqqasutulluunniit ipjaartarluta.

Uanilu immaqa ilaatigut eqqarsartoqarsinnaavoq RG kisiat annertuallaamik sinerissatsinni isumalluutiginiarpallaalersimavarput, taannalu kisiat inersisaasussatut utaqqivallaarlugu, immaqa ineriartorneq pitsaanerusoq orninneqarsinnaavoq annerusumik nammineq iliuuseqaqataanikkut. Soorlumi tamanna misilittagaalersimasoq sumiiffiit ilaanni, Halibut Greenland ammarneqarnerata kingorna tunisinermi akitigut qanoq pitsaanerutigisumik inissisimatitsilersimanermik, taannaavorlu takussutissaalluartoq, pisortat kisiisa utaqqinagit nammineq iliuuseqarnikkut puttallakaasinnaassorpasuit.

Naak oqallisissiaq kalaallisuumiit qallunaatumut nutserneqarnermini immikkoorluinnartut marluk kukkuneqalaarsimangaluartut, tassalu tukertitsiveqarneq taavalu uumatitsiveqarneq uani oqallisissiaqartup eqqartungaa suusoq nalunanngilaq, tassalu uumatitsiveqarneq.

Tassanilu inersisaqqinnissami ilaatigut naalakkersuisut akilersinnaannginneranik RG-imi tunitsivileeqqinnissamut oqariartuutaat soorunami isiginngitsuusaarusunnanngilaq, taamaattorli taava uaniilerlunittaaq apeqqut; akilersinnaanngorlugu taava qanoq inississinnaavarput, oqaannarata akilersinnaanngilamik?

Ila sorpassuuisinnaangaluaqaat suli uani apeqquteqaat aallaavingalugu oqallisissiami oqaatigineqarsinnaasut, oqallisissiaqartorlu Siverth K Heilmann, aataqqii, Atassut qujaffigerusuppara.

Atassummiit taama oqaaseqarluta oqallisissiamut oqaaseqarsinnaagatta qujavugut, neriullutalu naalakkersuinikkut annerusumik suli suliniartoqaqqikkumaartoq uuma oqallinnerup kinguneranit.